

HEIMIR



IX. árgangur

WINNIPEG, 1913.

2. blað.

Heimir.

—:O:—

Með síðasta blaði byrjaði Heimir 9. árið. Það virðist langur tími, er vjer nú horfum til baka, frá því haun var stofnaður. Þá voru fáir miklum efnum búnir og eru það eigi enn, þó hagar margra Ústara standi nú betur en þá. Og það voru örfáir menn er fyrst settu blaðið á fót. Til þess lögðu þeir fram, sumir nokkra dali, og aðrir nokkra dali og allmikla vinnu að auk. Ekki var það gjört í gróðaskyni, heldur ef svo mætti verða, til styrktar trúarskoðunum vorum og fjelagsmálum vorum til eflingar.

Viðleitinni var ekki alstaðar vel tekið. Var ekki við því að búast f. á flokkum þeim sem andstaðir eru skoðunum þeim, er blaðið ætlaði að flytja, — voru þeir því mjög andvegir, — en vonbrigði vora það nokkur, er þeir sem maður taldi samverka og samfjelagsmenn voru að litlu eða engu vingjarnlegri í blaðsins garð. Gjörðust sumir þeirra nauðugir, kaupendur blaðsins, og gleymdu skuld sinni við það, er þeir borguðu aðrar skuldir sínar, þótt þeim væri ekki með öllu ókunnugt um erviðleika útgefenda, og að þeir yrði að bera af eigin ramleik kostnaðinn við útgáfu blaðsins. Auðvitað var útgefendum skylt málið, en þó engu skyldara en öðrum fjelagsmönnum, vegna þess að ritið var einverðunga stofnað fyrir kyrkjufjelagið.